

## Ussa vegnan ils archeologs en funcziun

Las lavurs vid la ruina dil casti da Putnengia en Val Tujetsch cuntinueschan

Da Hans Huonder/ANR

**Miez uost vegn instradau la secunda etapa dallas lavurs per conservar la ruina dil casti da Putnengia a Dien en Val Tujetsch. La fin da l'auter onn quenta il Forum cultural Tujetsch da saver terminar il project. Ils cuosts totals persunter ein calculai cun rodund 200'000 francs.** Il casti da Putnengia a Dien ei vegnius construivus enturn 1200 entras la claustra da Mustér. Il baghetg principal era circumdaus d'in sfoss e d'edificis secundars, per exempel baghetgs per ils animals da casa. Ils historichers e perscrutaders dalla Val Tujetsch supponan, ch'il casti seigi staus habitaus rodund 350 onns, oravontut dallas famiglias da Putnengia. Da quellas famiglias deriva era il prenci-avat dalla claustra da Mustér, Pieder da Putnengia. Sin fundament d'indecis ch'ins ha, ei il casti eventualmein barschaus giu. Schebein quei ei schabegiau duront il temps ch'el era habitaus ni pér suenter, san ins buca. Cun occasiun dallas lavurs che suondan ussa, vegnan ins forsa empau pli datier da quella damonda. Dil casti existan oz mo pli singulas parts dallas preits. Las lavurs da conservar succedan sut la survigilanza ed igl accumpignament digl Uffeci per la tgira da monuments dil cantun Grischun.

### Secunda etapa ei sin rucca

Las preparativas per las lavurs da conservar la ruina dil casti da Putnengia han entschiet avon tschun onns. Suenter che la grupp da protecziun civila ha exequiu empremas lavurs sil plaz, ei allura sesplegada igl onn vargau l'emprema etapa dalla sanaziun dils mirs. Quei ei succediu cun ina maula speciala cun differentas cumponentas "Entochen ussa havein nus investau rodund 100'000 francs en quei edificis", di il president dil Forum cultural Tujetsch, André Schmid da Sedrun. Cuntenidas en quellas investiziuns ein era las lavurs da planisaziun e da survigilanza. En rodund treis jamnas vegn la secunda etapa lantschada. La finamira da quella ei d'allontanar il material - crappa, glera e tratsch - che sesanfla egl intern dalla ruina. Quei succeda buca mo per motivs estetics, mobein era per che l'aua sappi cuorer naven igl avegnir. Cass cuntrari fuss la lavur exequida periclitada. Il medem mument ston ils mirs vegnir conservai endadens. Mo era entuornla ruina duei vegnir allontanau empau material, denton mo aschia ch'ils mirs ein buca periclitai. "Nus lein vegnir giu sil nivel dil plantschiu d'antruras", declara André Schmid. Ils cuosts per quella secunda etapa ein calculai cun ina summa da rodund 60'000 francs.

### Novas scopertas?

En quella fasa vegnan las lavurs survegladas d'in representant digl Uffeci per la tgira da monuments dil cantun Grischun. Probablamein vegn era il survetsch archeologic en funcziun el decuors da quella etapa. "Duront las lavurs gia succedidas havein nus anflau cups ed uaffens ordies e metal da pli baul. Nus essan perschudi, ch'ulteriurs utensils vegnan neunavon duront las lavurs dil proxim temps", di André Schmid. Suenter las lavurs d'uonn duessen tuttas restonzas dalla ruina dil casti puspei esser alla glisch. L'auter onn vul il forum allura aunc laschar exequir las lavurs dil contuorn. Denter auter eis ei previu d'allontanar entginas plontas che cuarclan oz il maletg dalla ruina dil casti. Pigl onn 2006 ei previu ina fiasta "d'inauguraziun", probablamein en connex cun in arranschament cultural. Per occurrenzas dalla cultura duei la ruina allura era survir silsuenter. Ina dallas finamiras dils iniziants ei denton era da far accessibels il plaz cun ina senda da spassegiar. Il medem mument duei vegnir montau ina tabla d'informaziun ch'indichescha igl essenzial da quei baghetg historic.

Las investiziuns ella secunda etapa ein aunc buca segiradas cumpleinamein. "Nus prevedin aunc d'arranschar enzacontas acziuns. Aschia edin nus era per l'auter onn in calender cun maletgs d'antruras dalla Val Tujetsch. Plinavon vegnin nus ad organisar in lotto", di il president dil forum. Ils daners recaltgai entochen ussa derivan da pliras varts, denter auter dalla vischnaunca da Tujetsch, dil cantun Grischun, mo era d'instituziuns, fatschentas e privats.